

Dat steiht d'r in:

- Nögen to d' Ledenversammeln
- Laudatio Keerlke-Pries
- Plattsound 2023 in Leer

- Vörleestelefoon Oostfreesland

- Driest noch wat tolehren

1. Februar 2024

## Nögen to d' Ledenversammeln

up

**Saterdag, de 9. Mäart 2024, 10.00 Ühr,**

in dat Gemeenzentrum, Fliederweg 1, 26556 Utarp.

**10.00 Ühr**

Begröten / Tee un Kook

**„Platt in de Medien“**

Vördrag van Frank Jakobs, Journalist bi de NDR

**11.00 Ühr**

**Ledenversammeln**

1. Protokoll van de Jahresversammeln an de 18. Mäart 2023 in Grootheid
2. Allgemein Jahresbericht
3. Bericht over de Finanzen
4. Bericht van de Kassenprüfers
5. Utspraak over de Berichten
6. Entlasten van de Vörstand
7. Wahlen van de Vörstand
  - Wahl van en Wahlleiter
  - 1. Vörsitter/ske
  - 2. Vörsitter/ske
  - Penningmester/ske
  - Schriever/ske
  - 5 Bisitters/kes
8. Wahl van de Kassenprüfers
9. Andragen
10. Wat d'r anners noch anliggt

Andragen för de Ledenversammeln mutten bit to de **1. Mäart 2024** bi uns wesen!

Mit beste Gröten



Hans Freese, Vörsitter



## „Platt wird oft erst im Alter interessant“

Laudatio van Gertrud Reitmeyer

De Överschrift stunn över de Artikel to uns leste Jahreshauptversammlung, un de is mi so richtig in 't Oog stoken un hett mi to nadenken brocht! Ik bün Gertrud Reitmeyer, hebb lange Jahren tosamen mit mien Kolleeg Artur Reents för d' Landkreis Leer as Plattdüütskbeupdraggte unnerwegens west un bün butendeem siet 2018 in d' Vörstand van Oostfreeske Taal.

Vandaag dūr ik nu de Laudatio för de neje Keerlke-Priesdrager hollen.

Man eerst will ik jo vertellen, wieso mi de Artikel so in 't Oog stoken is: Ik hebb twee Wichter, de nu beid al lang groot sünd. Mit de beid hebb ik fröher, as se noch lüttjet wassen, immer blot Hoogdüütsk proot, wiel ik docht hebb, dat dat för de Kinner beter was. Vandaag weet ik, dat dat nich so is, un dat dat för de Kinner vööl beter west weer, wenn se tweesprakig upwussen weren: Man dat is nu to laat, daar kann ik nix mehr an ännern. De beid verstahn woll Platt un de Jungste proot dat ok bi d' Arbeit, de Ollerde aver gaar nich.

Harr ik mi to de Tied al mehr mit de plattdüütske Spraak beschäftigt, denn harr ik mi seker anners verhollen. Up mi trefft de Överschrift van de Artikel also vull to.

Un daarmee dat bi de nakomende Generation beter word un de nich de glieke Fehler maken as ik, hebb ik mi seggt, as PB wullt du alls Mögelke daarför doon, dat de Kinner van vandaag en anner Instellen to de Spraak kriegen un de plattdüütske Spraak ok proten.

Somit hebb ik mi in all de Tied as PB besünners um de Schoolkinner kümmert un versöcht, even disse Kinner för de plattdüütske Spraak to begeistern. Tosamen

mit mien Kolleeg Artur Reents bün ik na de Kinnergaarns un na de Grundscholen van d' Landkreis Leer henfahren. An de Scholen hebben wi an Plattdüütsk interesseerte Schoolkinner as Schölerplattdüütskbeupdraggte insett.

Disse Kinner hebben mit uns Stöön an de Scholen Aktionen för Plattdüütsk startet un uns bi uns Aktionen in Septembermaant ok hulpen.

Dat harren wi ok over en lang Tied heel good an d' Loop, bit denn Corona kweem. Dör Corona is en groot Deel van dat, wat wi up d' Weg brocht hebben, weer utnannerbroken, Aktionen dürfen nich dörföhrt worden, un de persönliche Kuntakten mit de Schölerplattdüütskbeupdragkten kunnen ok nich mehr stattfinden. Dat weer heel spietelk.

Nu weten ji, waarom mi de Överschrift so in 't Oog stoken is, un nu will ik ok nich mehr över mi proten, denn ji willt ja vööl lever weten, well de Keerlke vandaag woll kriggt, oder?

Tja, dat mutt ja ok en Persoon wesen, de sük düchtig för de Spraak insett hett un ok immer noch insetten deit. Wi hebben daar an een docht, de all siet lange Tied aktiv daarbi is. Een, de dat heel wichtig is, dat bi all Veranstaltens de Kinner mit inbetracken un anproot worden, un dat nich blot in de Scholen un Kinnergaarns, ok bi all anner Veranstaltens.

Bi uns tokünftige Priesdrager fung dat an mit Veranstaltens in Leer, daar hett he:

In d' Innenstadt en Luftballonwettbewerb för Kinner organiseert, bi de de Kinner ok wat winnen kunnen.

He hett ok al, in Tosamenarbeit mit de Plattdüütskbeupdragkten van de Stadt Leer un van de Gemeenten ut de Land-



kreis Leer un mit de Hülp van de Schölerplattdüütskbeupdragten, bi Multi in Leer för en goden Zweck an ´t Waffeln backen west.

Un daarmit de junge Ollen ok futt bi hör neegeboren Kinnerkes daaröver nadenken, of se mit hör Kinner Platt proten, hett he daarför sörgt, dat de Ollen in de Kliniken kört na de Geburt van dat Kind en groten Umslag mit Informationsmateriaal over Plattdüütsk mit na Huus kregen.

In disse Sömmer hett he tosamen mit Grietje Kammler van ´t Plattdüütskbüro wegen dat Umsetten van de „Europäische Charta för Regionaal- of Minderheidenspraken“ na de Landraden, de Börgmesterskes un de Börgmesters hen west, um mit hör daarover to proten, wo dat Umsetten lopen kann.

So as ik höört hebb, weren de Landraden, de Börgmesterskes un de Börgmesters heel kooperativ. Se willen daarför sörgen, dat hör Steden un Gemeenten ok immer Plattdüütskbeupdragten hebben un dat disse Plattdüütskbeupdragten ok over en Etat verfögen köönt, um Aktionen to organiseren oder an anner Aktionen deeltonehmen.

An disse Stee en groten Dank van uns an de Landraden, de Börgmesterskes un de Börgmesters.

Ji sünd ja seker ok all Teedrinkers, oder? Vör en paar Jahren kunn man bi Multi disse Teedösen mit en plattdüütske Beschriftung kopen, ok dat is up de Idee van uns tokünftige Priesdrager in Tosamenarbeit mit de Chefs van de Multimarkten entstahn. Un Geld is daar ok noch bi röverkomen, genau seggt 7000 € ut de Erlös van de Verkoop van de Teedösen, denn för jede Teedöös, de verköfft worden is, kregen wi 50 Cent. Dit Geld sull denn ok sinnvoll för Plattdüütsk anleggt worden, un so kweem uns tokünftige

Priesdrager up de Idee, all Grundscholen in d´ Landkreis Leer mit en Klassensatz plattdüütske Lehrboken uttostatten, sodat de Mesterskes un Mesters Unnerrichtsmateriaal för hör Plattdüütskunnerricht to Verföging harren.

Dit is dat Book „Mien eerste 1000 Woorden“, un vööl van jo hebben seker al daarvan höört. Intüsken word dat Book ok al an Scholen van Gemeenten in anner Landkreisen insett, un man kann dat ok kopen.

Un wat he ok noch maakt hett, of ji dat löven oder nich, as he 2015/16 van d´ Arbeidgever ut daarför insett weer, de ankomende Flüchtlingen to beplegen, hett he de ok futt Plattdüütsk bibrocht.

Un wenn bi sien Arbeidgever neje Utobildende instellt worden, vertellt he de futt heel vööl over de Sprachencharta un hier besünners over de plattdüütske Spraak un wo wichtig dat is, dat se sük för dat Erhollen van de Spraak insetten un de Spraak ok proten. Dat hett daarto föhrt, dat de junge Lüü daar en heel anner Instellen to de Spraak hebben un unneranner ok vööl mehr Plattdüütsk proten.

Butendeem is he noch Mitglied in de „interministerielle - interfraktionelle Arbeitsgruppe des Niedersächsischen Heimatbundes“.

Daar treffen sük regelmäßig Leden ut de Landdag van Nedersassen un Lüü ut de plattdüütske Szene ut Nedersassen un beproten, wat in Saken Spraakpolitik verännert un bewirkt worden mutt. To ´n Bispill dat Thema „Plattdüütsk in d´ School“: Daar hett de Grupp dat schafft, dat de Lehrstuhl för de Nederdüütske Spraak an de Uni in Ollenbörg utbaut worden is un dat daar nu de Studiengang „Nederdüütsk up Lehramt“ anboden word.



Privaat is he van Kind of an en Plattproter. Egaal waar he is, hett he dat Thema Plattdüütsk bi d' Kopp (ehrlich seggt, ik lööv, he kann gaar keen Hoogdüütsk). Un wenn he eerst maal anfängt, denn kann hüm keen een mehr bremsen, denn sprudelt dat man so ut hüm herut.

In sien Wohnort hett he en Stammtafel 66 in 't Leven ropen, daar vertelt he de interesseerte Lüü tweemaal in d' Maant alls over Plattdüütsk, to 'n Bispill, wat de Sprakencharta beseggt, waar de Spraak herkommt, wat dat mit de „Lautverschiebung“ up sük hett, wo man de Woorden utproten deit un wo dat schreven word. Un denn öövt he Plattproten mit de Lüü.

Un wenn dat in Rhaudefehn um de Veranstaltens „Frotzeln mit Harm“ geiht, un wenn Harm Stöön bruukt, denn is he ok

daarbi. För Plattdüütsk is he immer erreichbar, sien Spröök is: Ji erreichen mi immer telefonisch unner 4 x die 4 und ich helfe Dir!

Dit is blot en lüttje Deel van dat, wat he all up d' Weg brocht hett, all kann ik dat hier gaar nich uptellen, so vööl is dat.

Aver nu weten ji al heel vööl över de neje Priesdrager un ji hebben mitkregen, dat he sük düchtig för dat Erhollen van de plattdüütske Spraak insett. Wi menen, dat he sük de Keerlke ok wirklich verdeent hett.

De een of anner hett seker ok al dör mien ganze Vertellsels raden, um well sük dat handelt, oder? Un de annern will ik nu nich mehr länger up de Folter spannen.

Der ditjahrige Priesdrager is  
ARTUR REENTS.





Dirty Dip ut Weener winnen dat Online-Voting un de darde Pries; hör Symbolchecks kriegen se van Frank Jakobs (heel rechts), frei Journalist un bi NDR 1 (Foto: Schatz, Oostfreeske Landskupp).

## Terminen för dat Vörleestelefoon Tel. 04941-699944

24.01. – 07.02.24 Carl-Heinz Dirks  
07.02. – 21.02.24 Hilde Nörder-Hülsebus  
21.02. – 06.03.24 Christine Günnel  
06.03. – 20.03.24 Elise Andresen-Bunjes  
20.03. – 03.04.24 Anna Brandt  
03.04. – 17.04.24 Birgit Rutenberg  
17.04. – 01.05.24 Deike Borde

## Plattsounds in dat Leeraner Zollhuus

An de 11. November 2023 hett de Oostfreeske Landskupp dat Finale van „Plattsounds – de plattdütske Bandweddstried“ in dat Zollhuus in Leer utricht. 13 Bands ut heel Nedersassen harren sük daarför mit en sülvst schreven Leed qualifizeert. Annie Heger weer de Moderatorin an de Avend; Apollo Circus ut Emden un Stepdragon ut Bevensen weren för dat Rahmenprogramm tostännig.

Wunnen hett de Metalband Circuit Breach ut Hannover mit hör Titel „Apotheosis III: Duality“. Se hebben daarmit 1000 Euro kregen un en Platz in dat Halvfinale van de Weddstried „Local Heroes“. Up de tweed Platz hett dat Terraform ut Celle mit dat Leed „Tiedenspeel“ schafft. Se hebben 600 Euro mit na Huus nohmen. De darde Platz

mit 300 Euro un de Publikumpries mit 300 Euro hebben Dirty Dip ut Weener wunnen. Bi dat Online-Voting, dat al vör dat Finale lopen is, kunn de Band de meeste Lüü van sük övertügen.

De Oostfreeske Landskupp hett sük an de Avend neet blot över de 500 Gasten in dat Zollhuus freit, man ok över de gode Luun, de de Deelnemers mitbrocht harren. Dat en Bült Lüü Interesse an de Veranstalten harren, kunn man ok an de Livestream sehn: 1300 Lüü bekeken sük dat Finale an de 11. November 2023 online. Wenn man daar nochmaal rinkieken will, geiht dat hier: [www.plattsounds.de](http://www.plattsounds.de)  
Plattsounds word 2024 van de Emsländische Landskupp utdragen; dat Finale sall an de 1. November 2024 in de Oll Schlachthof in Lingen stattfinnen.

Impressum: Platt - Bladd is en Informationsblatt van Oostfreeske Taal, Vereen för oostfreeske Spraak un Kultur i. V. Verantwortelk för dat, wat daar insteiht: Hans Freese, Vörsitter. Redaktion: de Vörstand. Georgswall 1 - 5, 26603 Auerk, Tel.: 04941-6981290, [oostfreeske.taal@ewetel.net](mailto:oostfreeske.taal@ewetel.net). Uns Datenschutzverklaren steiht up de Webbste [www.oostfreeske-taal.de](http://www.oostfreeske-taal.de)



## DRIEST NOCH WAT TOLEHREN Platt - Bladd-Raadsel, Utgaav Feberwaar 2024

Wenn ji de eerste Bookstaven van de Woorden 1 – 22 annannerhangen, kriegen ji rut, wat woll seggt word, wenn en Mannmink bi de Arbeit d'r en Slag tegen anhaut. (7 Woorden, 8 Sülven)

Dat sünd de Sülven: a – a – bild – drüpp – dul – e – ehr – ei – ei – em – er – er – fel – gals – gen – grog – güs – hin – huus – je – ka – karn – ker – kook – lert – men – mer – mer – moodsk – mütz – nacht – neei – ni – nöös – pann – rack – schiet – stee – steiht – stö – ta – te – ten – terg – tern – to – trum – up – ven – ven – vend – wark – weer – wick – wie (55 S.)

Daarna word söcht:

01. Bi Winterdag dragen de meeste Mannlüü `n langen ..... (2 S.)
02. Dat smakelk Eten kann man Kinner alltied vörsetten. (4 S.)
03. Geev dat fröher haast up elke Burenplaats. (2 S.)
04. Harren Handwarkers fröher hör Middageten in. (2 S.)
05. Tegendeel van „ollerweltsk“. (2 S.)
06. Kunn mien Opa fröher nich sünnner slapen. (2 S.)
07. Quacksalvers un ..... mutten mi to Huus ut blieven (Mt.). (3 S.)
08. Dat hett ok de langste Dag. (2 S.)
09. Is de Katt ut Huus, danzen de Musen up de ..... (2 S.)
10. Hebben ollerde Husen noch over d' Keller. (3 S.)
11. Elk kriggt wat he weert is, aver neet wat hum ..... (2 S.)
12. De Eems-Jade-Kanaal löppt bi Emden in de ..... (2 S.)
13. Dree Daag vör mörgen. (3 S.)
14. Daar mutt man mit ´n kött Auto hen (2 S.)
15. Sowat stunn fröher up elker Böhnerstee. (4 S.)
16. Word Speck, wenn he geel Kanten kriggt. (2 S.)
17. Dat verdrütt uns in disse Tied gau. (2 S.)
18. Dat süchst du, wenn du di in d' Spegel bekickst. (3 S.)
19. Daarin hollen sük backt Kookjes langer (Mt.). (2 S.)
20. Lüttje Mann hett nix as ..... (4 S.)
21. Bi Winterdag is dat wat heel Leckers. (3 S.)
22. Lüstig Umschrieven „Antje Balk hett sük uphangen“. (2 S.)

Schrievt de Woorden up en Kaart, daar unner dat, wat rutkummt un stüürt de an Andreas Gerdes, Dimmtweg 5 in 26607 Auerk-Sandhörst. Ji köönt de Uplösen ok mailen an [andreas.gerdes5@ewetel.net](mailto:andreas.gerdes5@ewetel.net). Tied is bit to de **29. Feberwaar 2024**. Unner all Insendungen, de Kaarten, Brevon of E-Mails, de ditmaal bi mi ingahn, word weer een Book verloost. Dat Raadsel ditmaal stammt ut Kopp un Penn van Else Bontjes, Berer Weg 5a, Leezdörp.

Ik hoop, dat all Raderskes un Raders dit Raadsel weer blied maakt. Wenn de een of anner d'r maal nich mit klaarkummt, kann se/he sük driest hören laten. Daar sünd 91 Uplösens van dat November-Bladdje 2023 bi mi ingahn. Wunnen hett dat Book Siebelt Bajen, Brüder-Knauß-Str. 15, 64285 Darmstadt. Wi graleren van Harten. Nu wünsk ik all Raadselfründinnen un -frünnen vööl Pläseer bi ´t Utklamüüstern van de Begrippen.

Dat Raadselfründin un ik wünsken all Raadselfründinnen un -frünnen alls Gode för de komende Maanten in dat neje Jahr 2024.

Jo Andreas Gerdes „Oostfreeske Taal i. V. Auerk“